

Isaias

E buki di Isaias ta e promé profétiko i e promé buki di e profetanan mayó den nos Beibel. Hopi studiante di Beibel ta konsider'è e buki profétiko mas importante di Tèstament Bieu. Su profesianan ta entre esnan mas largu (Isaias ta kontené mas kapítulo) i ta e buki profétiko mas stimá. Segun Merrill Unger: “Isaias...ta e gran profeta mesiániko i prens di miradónan di Tèstament Bieu. E ta surpasá tur (otro profeta) den splendor di uso di palabra, imaginashon briyante, bunitesa i abilidadat pa kambia di stail, profundidat i hanchura di vishon profétiko.”

I. OUTOR DI E BUKI

Nòmber di e buki ta bin for di e outor humano, Isaias (1:1). Su nòmber na idioma hebreo ta *Yesa-Yahu*. E ta un kombinashon di palabra ku ta nifiká “Jehova ta salba,” “Jehova ta salbashon,” òf “salbashon di Jehova”. Apropiadamente, por bisa ku un tema básiko di e buki di Isaias ta salbashon. Isaias ta usa e palabra “salbashon” (27X), “salba” (13X) i “Salbador” (8X).

Mayoria profeta ta duna poko informashon personal den nan buki. Nan a pone nan proklamashonan pretu riba blanku sin laga e lektor sa nan reakshon personal. (Jeremias i Oseas ta eksepsionnan.) Klaramente Beibel ta enfatisá nan *mensahe* na lugá di nan *persona*. E mensahe ta e kos importante pa nos sa. Isaias tambe a duna poko informashon tokante su persona. Ma el a duna mas informashon ku algun otro profeta.

Fecha di nasementu di Isaias ta dekonosí. Ma nòmber di su tata si ta konosí, Amos (no e profeta Amos). Su nòmber ta aparese hopi biaha den Beibel (1:1; 2:1; 13:1; 20:2; 37:2,21; 38:1; 2 Rei 19:2,20; 20:1; 2 Kron 26:22; 32:20,32). E echu ku nòmber di e tata ta mensioná tantu biaha, por indiká ku Isaias tabata di un famia prominente i ku bastante influensia. Segun tradishon hudiu, Isaias tabata famia di rei—Amos tabata yu di rei Joas, i pues Isaias tabata ruman di rei Amasias i primo di rei Uzias. Ma nada di esaki por ser probá! Ma su buki ta duna impreshon ku Isaias tabatin hopi kontakto personal ku mandatarionan i lídernan sivíl. Asta ta parse ku Isaias tabatin bon kontakto ku e rei malbado, Akaz, i mas hende di puesto haltu durante su reinado.

Isaias tabata kasá (8:3). E teksto no ta divulgá nòmber di su esposa; bisando solamente ku e tabata un “*profeta muhé*”. I Isaias tabatin por lo ménos dos yu. Aloménos nos sa nòmber di yu hònber: Sear-jasub (7:3) i Mahar-salal-hasbaz (8:3). E dos nòmber aki tabatin nifikashon spesial pa ku Isaias su mensahe. Mahar-salal-hasbaz ta nifiká lihé ta e botín; rápido ta e proi. Isaias su mensahe relashoná ku e nòmber aki tabata, si pueblo di Dios ta nenga bira for di nan idolatria i piká, Dios lo kastigá nan dor di pèmití un nashon pa konkistá nan i saka nan for di nan pais, pertenensianan ku tur. Sear-jasub, nifikando un restante lo bolbe (referiendo na e poko hudianan ku lo regresá na nan tera despues di eksilio), tambe ta kontribuí na Isaias su mensahe. Despues ku Dios kastigá nan ku koutiverio na un otro pais, E lo pèmití un grupito so pa regresá na nan tera

Isaias 6 talbes ta relato di Dios Su yamada di Isaias. Si esei ta e kaso, por bisa ku kapítulo 6 di bèrdat lo tabata e promé kapítulo di e buki si Isaias tabata sigui un sistema

kronológiko. Ma ta pusíbel ku e tabata un yamada pa un ministerio mas amplio despues ku su ministerio a kuminsá. Talbes e vishon di Isaias 6 a sosodé ora e tabatin 20 aña.

Isaias tabata profeta na e pais di Juda.

Sin duda Isaias a haña un bon edukashon i tabatin abilitat intelektual eksepsional. Di bèrdat e lo tabata un di e personanan mas sabí di su era. Poko profeta por a igualá Isaias riba e tereno aki. Esaki ta visto dor di su skirbimentu maestral. Algun di Isaias su profesianan ta literatura di alta kalidat (por ehèmpel Isaias 53).

Tambe ta visto ku Isaias tabata un fiel lesadó di “korant” di su era. E no solamente tabata bon na haltura loke tabata pasando riba un nivel nashonal, ma e tambe tabata sa loke ta pasa den mundu internashonal. Diesun kapítulo di su buki (13-23) ta kontené profesianan di Dios Su huisio riba otro nashonnan. I nan tur no tabata nashon bisiñá di Juda. E tambe a skirbi di Asiria i Babilonia, nashonnan hopi pariba di Juda. Pa skirbi ku tantu detaye, ta mostra ku el a haña e informashon di un òf otro forma. (Ta parse ku Isaias lo a biba na Jerusalèm. E echu ei di mes lo a fasilitá su konosementu di loke ta pasando riba nivel nashonal i internashonal.)

Ta parse ku Isaias tabata un historiadó—pusíbelmente e historiadó di rei. Dos Krónikanan 26:22 i 32:32 ta laga sa ku Isaias a skirbi historia di sikiera rei Uzias i Ezekias.

Humanamente mirá por bisa ku Isaias su ministerio tabata un frakaso. Pueblo di Juda no a skuch’é. Ma esei ta presis loke Dios a bis’é lo ta e reakshon asta for di tempu di su yamada (6:9-10 – “Sigui skucha, ma no komprendé; sigui mira, ma no ripará. Hasi kurason di e pueblo aki insensitive, hasi nan orea sordo i nan wowo skur, pa nan no mira ku nan wowo, tende ku nan orea, komprendé ku nan kurason, i repentí i wòrdu kurá.”). Maske Isaias probablemente tabatin hopi influensia riba e reformashon spiritual den era di Ezekias, esei no a dura hopi. Ora Manasés, yu di Ezekias, a bira rei, e pronto a destruí tur loke Ezekias a hasi. E hendenan a desviá mas di Señor ku tabata e kaso den pasado.

Sin duda e profeta lo tabata hopi aktivo den su ministerio, muchu mas ku Beibel ta indiká. Entre otro, no ya kaba a menshoná ku Isaias lo a promové e reformashonnan spiritual ku rei Ezekias a inisiá. Ma buki di Isaias ta duna solamente tres diferente bistaso di e ministerio di Isaias fuera di Isaias 6. Den kapítulo 7, e profeta a konsehá i reprendé rei Akaz. El a avisá rei pa no forma aliansa ku Asiria. Ma Akaz no a skucha i a sufri e konsekuensianan. Den kapítulonnan 36-39, e profeta tin kontakto ku rei Ezekias diferente biaha—dos okashon en general. Den un kaso, rei a skucha i a haña Dios Su bendishon. Den e otro kaso, Isaias a laga Ezekias sa di e konsekuensia di su aktitud indiferente pa ku Dios.

Entre otro, Isaias su ministerio a tuma lugá na presis e mésun tempu ku Asiria tabata konkistá i deportá habitantenan di Israel, e nashon di nort. Sin duda e profeta lo a hasi uso di e ehèmpel negativo aki pa spierta su pueblo, Juda. E tabata ke pa nan ripará ku Israel a eksperensia e kastigu di *Dios* pa motibu di nan piká. E tabata ke pa Juda repentí pa nan no haña nan den e mésun situashon penoso. Ma pueblo di Juda no tabata interesá pa skucha.

Mas na komienso di su ministerio, Isaias a prediká ku su pueblo por skapa e kastigu di Dios si nan repintí. Ma mirando nan kapricho, Isaias tabata sa ku Dios lo kastigá nan. Pues, despues di tempu, su predikashinan a kuminsá enfatisá mas tantu restorashon di pueblo di Dios *despues* ku nan ta sufri kastigu na Su man, pasobra nan no por skapa mas e kastigu di Dios.

Fecha i sirkunstansianan di morto di Isaias no ta konosí. Segun *Mishna* (promé parti di *Talmud*, konteniendo interpretashonnan oral di reglanan bíbliko), e rei malbado, Manasés, a mata Isaias (mira 2 Reinan 21:16). E buki *Asenshon di Isaias* (apokrafia di Tèstament Bieu) ta bisa ku Isaias a wòrdu poné den un tronkon hòl di palu i a zag na dos pida. Algun ta pensa ku Hebreonan 11:37 (“...nan a wòrdu gezag na dos...”) ta referí na Isaias. Ma atrobe, no ta konosí si esaki ta bèrdat.

Relashoná ku fecha di morto di Isaias, ta lógiko pa konkluí ku Isaias a muri despues di aña 681 B.C. pasobra Isaias a menshoná morto di Senakerib (37:37-38) i Senakerib a muri e fecha ei.

Ki sorto di hende Isaias tabata?

No tin duda ku Isaias tabata un hòMBER spiritual i deboto pa ku Dios. Ora rei Ezekias tabatin mester di konseho di un hòMBER di Dios, mes ora el a selektá Isaias, realisando ku Dios ta papia dor di dje. El a obedesé Dios maske Dios a bis'é ku su kongregashon lo no skuch'é i maske e mester a reprehendé rei. El a para firme i a nenga hasi kompromiso. Klaramente el a konfia Dios. No tabatin lugá den su bida pa duda òf kosnan mundano. El a mira hende i kos for di Dios Su punto di bista. E tabatin hopi discernimentu. E tabata un hòMBER sinsero.

Den su buki, e profeta tambe a eksaltá Dios bes tras bes. Ora el a haña e vishon di Dios (Isaias 6), mes ora el a realisá su mes piká—un indikashon di madures spiritual. Ta parse ku despues di tende e serafinnan yama, “Santu, Santu Santu, ta e SEÑOR di ehersitonan” (6:3), e no por a kita e santidat di Dios for di su mente. Rípidamente (25X) Isaias a yama Dios “Esun Santu di Israel”, mientras ku tur e otro outornan di Beibel a usa e palabranan ei solamente seis biaha. E ekspreshon ei tambe ta revelá e seriedat ku kua Isaias a tuma e piká di su pueblo kontra nan Dios.

Isaias tabata un hòMBER di kurashi, sin miedu. E no a spar ningun klase di hende. El a denunsiá tantu mandatarario komo suidadano. A tuma basta kurashi pa Isaias reprehendé rei Akaz, un persona ku por a ehekut'é. El a papia ku su paisanonan na un forma kla, mustrandu nan kon nan ta mirá den bista di Dios. Ma di otro banda, su amor pa su pueblo tambe ta bisto. Isaias a papia ku tenura, simpatia, ku kariño, manera un mama ku ta stima su yunan.

Isaias tabata un hòMBER hopi respetá entre su paisanonan. El a usa su influencia pa bon pa ku e nashon di Juda. E no solamente tabata un profeta, ma tambe tabata un poéta, oradó i un lider respetá.

II. FECHA DI E BUKI

Ta masha difísil pa keda kla ku fechanan konkreto pa diferente profeta. Ma en kontraste di algun buki profétiko, Isaias ta duna diferente indikashon klave pa ku fechanan: “Den e aña ku rei Uzias a muri...” (6:1), “Awor a sosodé den e dianan di Akaz...” (7:1), “Den e aña ku rei Akaz a muri...” (14:28), “Den e aña ku Tartan a bin Asdod...” (20:1), “...den e di dieskuater aña di rei Ezekias...” (36:1), morto di Senakerib (37:38). Ta parse ku e eventonan a sosodé den e òrdu kronológiko ei.

Sinembargu preguntanan ta keda pa ku e buki di Isaias. Algun estudiante di Beibel ta di opinion ku Isaias 6 a sosodé na inisio di Isaias su ministerio. Otronan ta konvensé ku kapítulon 1-5 ta profesianan di Isaias promé ku el a mira Dios riba Su trono. Di tur manera, segun kalkulashon di E.R. Thiele, Uzias a muri na aña 740-739 B.C., fecha di kapítulo 6. Ta parse ku Isaias su ministerio lo a kuminsá algun aña promé.

Segun 1:1, Isaias a profetisá durante reinádo di Uzias, Jotam, Akaz i Ezekias. Jotam a reina 16 aña (2 Reinan 15:33), Akaz pa 16 aña (2 Reinan 16:2) i Ezekias a reina pa 29 aña (2 Reinan 18:2). Ezekias a kuminsá reina seis aña promé ku kaída di Samaria na aña 721 B.C. (2 Reinan 18:10).

Loke ta bruha e konteo ta ku reinado di algun rei a kuminsá durante e parti final di e rei promé ku nan. Den otro palabra, algun rei a reina huntu ku nan tata, promé ku e rei-tata a baha. Di tur manera, Ezekias ainda a reina 23 aña despues di kaída di Samaria.

Segun 2 Krónikanan 32:32, ta parse ku Isaias a skirbi historia di rei Ezekias, i esaki lo a sosodé despues di Ezekias su morto na aña 686 B.C.

Tambe Isaias a mensioná den detaye e asesinato di Senakerib (37:37-38). Esaki a tuma lugá na aña 681 B.C...sinku aña despues di morto di rei Ezekias. Pues, por bisa ku su ministerio a ekstendé pa e era ku Manasés tabata rei (696-642 B.C.).

Pues ta parse ku Isaias tabatin un ministerio largu—kisas asta 60 aña—durante un era ku tabata hopi importante pa tur dos reino: Juda i Israel. Pues, fecha di Isaias su ministerio por ta 740 B.C. to 680 B.C.

Isaias lo a skirbi su buki poko aña despues di 681 B.C.

III. ERA DI E BUKI

Manera nos a mira ya kaba, Isaias 1:1 ta bisa ku el a profetisá durante reinado di Uzias, Jotam, Akaz i Ezekias. Dos Reinan 14-21 i 2 Krónikanan 26-32 ta duna trasfondo históriko di e era ei. Kiko tabata sosodé na Juda i e paisnan rònt di dje?

Si Isaias a nase na aña 760 B.C., su añanan di niñes tabata durante un tempu di prosperidat, durante reinado di rei Uzias. Esaki tabata un era bastante bon pa Juda. Uzias i Jotam tabata bon rei—reinan ku a sirbi Dios.

Ma manera semper, ta parse ku e prosperidat a okashoná degenerashon. Hende a biba den luho i konsekuentemente kon ku ta. Akaz tabata un mal rei ku no a biba pa Señor. Ezekias a sigui nan ku un bon reinado.

Ma pa motibu di loke tabata pasando riba e esena internashonal e tambe tabata un era hopi difísil pa Juda. Era di Isaias tabata un era ku imperonan tabata lamta nan kabes i krese. Impero di Asiria ya kaba tabat'ei. Egipto, lokalisá suit di Juda tambe tabata un potencia mundial. Israel i Juda tabata lokalisá nèt riba e ruta ku e ehersitonan di e dos potensianan internashonal lo pasa. Kome resultado, e tera primintí a bira e sitio unda batayanan a tuma lugá. Ta parse ku un tempu rei Ezekias a buska yudansa di Egipto pa defend'é kontra ehersitonan di Asiria. Ma e profeta a instruí pa konfia Señor na lugá di Egipto (31:1; 36:4-6).

Isaias tambe a pre-mirá ku Babilonia lo bira un impero...i lo wòrdu destruí despues (13:19-22). Ademas talbes por bisa ku Isaias asta a pre-mirá impero di Media-Persia (pasobra el a menta nòmber di Siro [44:28-45:1], un rei di e impero ei, ku a libra e hudiunan).

Durante bida di Isaias, Asiria a menasá i konkistá Israel, bisina di Juda. Asiria a hiba nan den koutividat. Isaias a mira ku Israel tabata na punta di kai i porfin a kai.

Asiria tabata un enemigu poderoso. E tabata un menasa serio pa Juda tambe. Rei Senekariba a kapturá algun stat di Juda i a rondoná Jerusalèm. Apersar di tur esaki, Isaias a para firme pa e prinsipio ku Juda su speransa no tabata den ehersitonan, sino den Señor. Dios lo protehá nan si nan bolbe n'E. Dios a protehá Juda ora nan a konfia den djE.

Ma en general, maske Juda a mira loke ta sosodé ku Israel, nan a sigui den e mésun pasonan ku a guia na dekadensia.

Amos i Oseas tambe ta duna un bon idea di loke tabata pasa na Israel promé i durante ministerio di Isaias, pasobra nan a profetisá nèt promé i durante kaída di Samaria. Tambe ta bon pa agregá ku Mikeas i Oseas a profetisá mésun tempu ku Isaias tabatin su ministerio. Probabelmente sikiera Mikeas i Isaias lo a konosé otro.

IV. LEKTORNAN DI E BUKI

E buki ta skirbí espesialmente pa habitantenan di e suidat di Jerusalèm i e pais di Juda (1:1; 2:1; 3:1). Ma e buki tambe ta kontené spiertamentunan ku ta regardá e pais na nort, Israel (28:1). I Isaias tambe tabatin mensahenan pa otro nashon pagano, manera Babilonia (13-14, 21:1-10), Moab (15-16), Damasko (17), Etiopia (18), Egipto (19), Edom (21:11-12), Arabia (21:13-17) i Tiro (23).

V. PROPOSITONAN DI E BUKI

Isaias tabatin siertu proposito pa skirbi su buki. Algun di e propositonan ei lo ta:

A. PA KOMUNIKÁ DIOS SU MENSAHE KU E PUEBLO DI DIOS

No tin duda ku Isaias tabata e vosero di Dios. E no a duna su mes mensahe òf ideanan. El a proklamá Palabra di Señor...sea ta un mensahe di kondenshon òf di konsuelo.

B. PA RETA PUEBLO DI DIOS PA REPENTÍ

Isaias a denunsiá e bunita aparenzia di religiosidat i moralidat. El a deklará ku no ta basta pa hasi komo sifuera bo ta *kere* ku bo mester ta santu. Echo ta, bo mester *ta* santu. El a mostra

kla ku repentimentu i reformashon tantu religioso komo moral ta nesesario na Juda, i el a hasi apelashon pa esei tuma lugá. Ku esaki en bista, ku fervensia el a skirbi di e rektitut di Dios.

C. PA AVISÁ PUEBLO DI DIOS DI E KONSEKUENSIANAN DI NO REPENTÍ

E profeta a laga sa ku huisio i koutiverio ta pendiente si nan no repentí.

D. PA RETA PUEBLO DI DIOS PA KONFIA DIOS

Buki di Isaias ta mostra bon kla ku Dios ta konfiabel. E buki ta kontené dos storia di reinan ku a wòrdu menasá pa reinan enemigu i kon nan a reakshoná:

1. Akaz no a konfia Dios. El a buska yudansa di Asiria (kontrario di konseho di Isaias), i a remplasá un krisis ku un otro krisis (Isaias 7).

2. Ezekias a konfia Dios (segun konseho di Isaias) i Dios a libr'é i Jerusalèm na un forma milagroso (Isaias 36-37).

E dos ehèmpelnan aki lo tabata lèsnan importante pa pueblo di Dios den eksilio. Nan ta enkurashá e hudiunan pa sigui konfia Dios apesar di nan kaptividat.

Isaias a pone hopi énfasis riba e nesesidat di fe. Komo resultado, algun ta kompará e buki di Isaias ku e buki di Romanonan den Tèstament Nobo. Otronan ta yam'é “e Profeta Evangéliko”, e “Evangelio di Tèstament Bieu” òf i “e profeta di redenshon”. Nos asta por bisa ku salbashon pa medio di Mesias ta presentá kla kla den e buki di Isaias

E. PA MUSTRA PUEBLO DI DIOS NAN FUTURO GLORIOSO

Isaias a komuniká un mensahe di kastigu pa piká (1-39) i konsuelo i grasía (40-66). Por bisa ku su lema ta: Dios Su salbashon pa Su pueblo ta pa medio di grasía so.

1. Isaias a profetisá ku maske nan lo bai den kaptividat, Juda tin un futuro glorioso.

2. Isaias a profetisá ku e nashonnan pagano lo eksperensia hopi bendishon.

3. Isaias a skirbi ku hopi entusiasmo di e Mesias ku tin di bin.

Mas ku tur otro outor di Tèstament Bieu, Isaias a antisipá binida di e Mesias (p.e. 7:14; 53) i e salbashon ku E lo trese. Meskos ku Tèstament Nobo ta presentá Kristo komo su tema, igualmente Isaias ta presentá Kristo komo su tema. Komo resultado, algun estudiante di Beibel ta duna Isaias un otro nòmber, “e di 5 evangelista”. I nan ta yama su buki, “e di 5 evangelio” (Mateo, Marko, Lukas, i Juan siendo e promé kuater).

VI. OPSERVASHONAN DI E BUKI

A. STAIL DI SKIRBI

Indudabelmente algun di e literatura hebreo mas bunita ku a wòrdu skirbí tabata skirbí pa Isaias. Mayoria di e buki ta skirbí na un forma poétiko, i el a hasi esaki na un forma maestral. El a skirbi di tal forma ku el a pone su buki biba pa e lektor.

Nota algun punto relashoná ku e stail i organisashon di e buki.

1. Isaias en general ta un serie di diskursonan ku e profeta a hasi na diferente tempu i okashon. E diskursonan di Isaias ta sigui e mesun patronchi general. Nos lo usa Isaias 1 komo un ilustrashon:

a. Akusashon – 1:1-9

b. Menasa – 1:10-15

c. Eksortashon òf súplika – 1:16-20

d. Promesa di purifikashon òf bendishon – 1:21-31

2. En general e diskursonan ta organisá na un forma kronológiko ora ta konserní historia. Ripará referensia na fechanan:

1:1 – “durante di e dianan di Uzias, Jotam, Akaz i Ezekias...”

6:1 – “den e aña ku rei Uzias a muri”

7:1 – “den e dianan ku Akaz...Rezin, rei di Siria, i Peka...rei di Israel, a bai Jerusalèm pa bringa kontra djé ma no por a konkist'é”

14:28 – “den e aña ku Akaz a muri”

20:1 – “den e aña ku Tartan a bin Asdod...i el a bringa kontra Asdod i a kaptur’ é”

36:1 – “den e di dieskuater aña di rei Ezekias”

37:38 - morto di Senakerib

3. Isaias a skirbi manera un oradó. Su diskursonan ta deseñá pa hala interes i pone hende tuma akshon.

4. Klaramente Isaias su stail di skirbi ta kambia ku kapítulo 40. Su stail ta bira mas poétiko i mas enkurashante.

5. Isaias a usa hopi linguahe simbólico. Por ehèmpel, Sion ta representá komo un esposa (49:18; 54:5) steríl (54:1) òf komo un mama (49:17; 51:18-20) ku su yunan a fayesé (49:21; 51:20).

6. Isaias su vokabulario ta hopi amplio. El a usa un gran variedat di palabra pa ekspresá su mes.

7. Isaias tin bes a skirbi na un forma sarkastiko pa eksponé i reprené e akshonnan i aktitutnan di pueblo di Dios (40:19-20; 41:6-7; 44:13-20)

B. KANTIKANAN

Mas parti Isaias ta un buki poétiko i ta kontené vários kantika. Algun di e kantikanan mas prominente ta:

1. Kantika di kunuku di wendruif - 5
2. Kantika di esnan redimí - 12
3. Kantika di e desierto ku ta flora - 35
4. Kantika di e esposa restorá - 54

C. SITANAN DEN TÈSTAMÈNT NOBO

Ningun otro profeta su nòmber ta aparesé tantu biaha den Beibel fuera di su mes buki ku e profeta Isaias. Nòmber di Isaias ta usá 38 biaha den otro buki di Beibel. En kontraste, nòmber di Jonas ta aparesé dies bes, Jeremias nuebe biaha i Daniel su nòmber ta bin dilanti sinku biaha den otro teksto di Skritura fuera di su mes buki

Isaias tambe ta e profeta mas sitá pa outornan di Tèstament Nobo. Tin ora nan ta sita Isaias na un forma dirèkt. Ma tin ora ta opvio ku nan ta referí na Isaias, ma no ta sit’ é dirèkt. Ripará algun di e sitanan dirèkt ku ta usa nòmber di Isaias den Tèstament Nobo:

SITÁ PA	TEKSTO DEN TN	TEKSTO SITÁ
Mateo	Mt 4:14-16 Mt 8:17 Mt 12:17-21	9:1-2 53:4 42:1-4
Marko	Mk 1:2-3	40:3
Lukas	Lk 3:4-6	40:3-5
Juan (apòstel)	Jn 12:37-41	53:1; 6:9-10
Juan Boutista	Mt 3:3; Jn 1:23	40:3
Hesus	Mt 13:14-15 Mt 15:7-9; Mk 7:6-7 Lk 4:16-21	6:9-10 29:13 61:1-2
Ofisial di Etiopia	Ech 8:28-27	53:7-8
Pablo	Ech 28:25-27 Rom 9:27 Rom 9:29 Rom 10:16 Rom 10:20 Rom 15:12	6:9-10 10:22-23 1:9 53:1 65:1 11:10

D. PERSPEKTIVA PROFÉTIKO

Kòrda ku den era di Tèstamènt Bieu, un persona ku a proklamá Palabra di Dios a hasi ún òf mas profesia ku por ser kumplí den korto tempu (durante su mes bida). Ora kada profesia a keda kumplí palabra pa palabra, esei tabata un evidensia ku e tabata un profeta di Dios, i por konfia su profesianan di largu plaso. Den buki di Isaias por haña tantu profesianan di korto plaso komo di largu plaso.

Dos ehèmpel di profesianan ku Isaias a duna ku a ser kumplí durante su mes bida ta lo siguiente: 1) e derota di Asiria (37:33). Esaki tabata un profesia masha riskante pasobra Asiria tabata e super-potensia di e era ei. 2) Profesia tokante Ezekias su enfermedat (38). Kumplimentu di e profesianan aki a sigurá pueblo di Dios ku loke Isaias a profetisá ku no a keda kumplí ainda lo ser kumplí. Nota dos ehèmpel di profesianan ku a ser kumplí despues di Isaias su morto: 1) Destrukshon di Babilonia (13:19-22; 47). Esei tambe tabata un profesia inkreíbel pasobra Babilonia tabata bira un potencia grandi. 2) Profesia ku un hòmer yamá Siro lo laga e pueblo hudiu regresá na nan mes pais (44:28; 45:1). E profesia aki tambe tabata inkreíbel debí ku Isaias a profetisá esaki 150 aña promé ku Siro (rei di impero persiko) a bin na mando. E profesia ta mas stupendo ainda pasobra el a duna nòmber di e rei. Tin solamente ún otro profesia den Beibel ku ta duna nòmber di un persona añanan adelantá, profesia di Josias (1 Reinan 13:2).

Ta bon pa komprendé tambe ku Isaias por tabatin kuater bista den su mensahenan:

1. E tabatin un mensahe pa e hendenan di su mes era.
2. E profeta a pre-mirá e kaptivitat di pueblo di Juda na Babilonia. Isaias a duna indikashon den e direkshon aki listando (entre otro “Sinar” den su profesia di 11:11. Anto den dianan di rei Ezekias el a konkretisá e profesia den 39:6, bisando bon kla, “tur loke bo tatanan a akumulá te dia djawe, lo wòrdu hibá Babilonia; nada lo no ked’atras...”
3. Isaias a pronostiká binida di e Mesias. Tin un gran kantidat di profesia asina espesialmente den Isaias 40-66. E profesianan ta regardá tantu Kristo Su promé binida komo Su regreso pa reina.
4. El a pre-mirá shelunan i tera nobo (65:17). El a profetisá ku e pueblo hudiu ku a ser plamá lo bolbe na nan pais (27:12-13; 43:5-7; 65:8-10) i ku Kristo lo reina pa mil aña.

E. PROFESIANAN MESIÁNIKO

Ku frekuensia Isaias ta yamá “prens di profetanan”. E nòmber aki ta apropiá. Un motibu pa e título ta pasobra Isaias ta konosí pa su profesianan mesiániko. Dios a revelá mas informashon tokante e Mesias na Isaias ku kualke otro profeta. Tin mas profesia di e Mesias den buki di Isaias ku den kualke otro buki profétiko, entre otro 7:14-15; 8:8; 9:1-2,6-7; 11:1-2; 35:5-6; 40:12-18; 42:1-3; 50:5-6; 51:13; 52:13-53:12; 59:20; 61:1-2; 63:1-6; 66:15-19

Segun Merril Unger, “Kada gloria di nos Señor i kada aspekto di Su bida na tera ta demonstrá den e gran profesia evangéliko aki.” Den e buki por haña e Mesias Su nasementu di un birgen, Su nòmbernan humano i divino, Su karakter, Su bida, Su umiyashon, Su morto, Su resurekshon i Su eksaltashon, Su di dos binida. Binida di e Mesias ta profetisá ku mas frekuensia ku den tur otro buki profétiko.

Tambe Isaias ta pone hopi énfasis riba e reino futuro di Israel. Segun Isaias, su kapital lo ta na Jerusalèm i hende di henter mundu lo bin na e siudat pa wòrdu siñá. Dios lo sinta riba e trono (spesífikamente un desendiente di Isaí—ma e punto aki no ta hopi enfatisá). E lo ta un era di pas i prosperidat. Adorashon apropiá i e sentralidat di lei lo ta ingredientenan importante den e reino.

F. DOS OUTOR?

Lástimamente nos tambe tin ku menshoná un idea absurdo ku e estudiante di buki di Isaias lo enkontrá tempran òf lat. Maske e ta un idea ku no ta armonisá ku Skritura, ta bon pa bo ta konsiente di e pensamentu di algun.

Hopi estudiante liberal di Beibel ta di opinion ku mester tin dos diferente outor ku a skirbi e buki di Isaias. Motibu ku nan ta duna pa nan kreensia ta pasobra kapítulonon 1-39 ta un stail

mientras kapítulonon 40-66 ta un otro stail. Nan ta afirmá ku kada sekshon ta hasi uso di un otro vokabulario.

Ma nos tin diferente pregunta relashoná ku esaki. Un outor no por tin mas ku ún mensahe? E mester hasi uso di e mésun stail di skirbi tur biaha? No ta lógiko pa e mésun persona hasi uso di siertu vokabulario pa siertu okashon i no pa otro?

Un di e motibunon kardinal pa un kreensia asina ta pasobra nan no ta kere ku milagernan por sosodé. Pasobra nan no ta kere den milagernan, nan mester inventá un manera pa splika kon ta pusíbel ku e buki di Isaias ta kontené profesianan detayá ku a wòrdu kumplí ku eksaktitut. Por ehèmpel, kon ta pusíbel ku Isaias por a identifiká Siro pa nòmber komo e mandatario ku lo libra e hudiunan (44:28; 45:1) añanan promé ku Juda a wòrdu hibá den eksilio? Nan no ke atmití ku esaki ta un profesia milagroso. Nan solushon ta pa proklamá na bos haltu ku Isaias #1 (outor di 1:1-39:8) di bèrdat por a biba den e era ku e buki ta indiká. Ma Isaias #2 (outor di 40:1-66:24) sigur lo a biba 150 aña despues di Isaias #1...pues, despues ku Siro lo a duna e hudiunan nan libertat.

Tur esaki ta puru lokura. Isaias 1:1 ta duna nòmber di e outor humano i nunca ta mensioná un otro outor. E implikashon ta ku e buki tin ún outor so.

Tekstonan den Tèstament Nobo ku ta sita Isaias no ta hasi distinkshon entre dos pusíbel profeta Isaias. Ripará tambe tekstonan manera Mateo 3:3; 12:17-18; Lukas 3:4; 4:17-21 (palabranan di Hesus mes); Juan 1:23 i Echunan 8:30-35.

Un teksto ku ta destaká ta Juan 12:38-41. E teksto aki ta sita buki di Isaias dos biaha. E promé sita ta tumá for di Isaias 53:1 (un teksto den “Isaias #2”) mientras e di dos ta sita Isaias 6:9-10 (un teksto hañá den “Isaias #1”). Ma ningun ora so e apòstel Juan ta duna impreshon ku e tekstonan aki ta tumá for di dos diferente outor. Al kontrario, Juan a papia komo sifuera ta e mésun outor. Ripará Juan su palabranan promé, meimei i despues di e dos sitanan saká for di buki di Isaias: “e palabra di profeta Isaias por a keda kumplí, ku el a papia...(sita di Isaias 53:1) Pa e motibu aki nan no por a kere pasobra Isaias a bisa tambe...(sita di Isaias 6:9-10). E kosnan aki Isaias a bisa, pasobra el a mira Su gloria, i el a papia di djE.”

Promé ku Hesus a nase, e kreensia tabata ku Isaias a skirbi henter e buki. Por ehèmpel, Hesus ben Sirak a skirbi e buki di apokrafia Eklesiastikus mas òf ménos na aña 180 B.C. E persona aki ta deskribí komo un hòmer “di gran diligensia i sabiduria” i “di hopi edukashon”. Hesus ben Sirak tabata sigur ku Isaias ta outor di ultimo 27 kapítulo di e buki. El a skirbi, “El [Isaias] a konsolá esnan ku a yora na Sion. El a mustra e kosnan ku tin ku sosodé na fin di tempu, i kosnan skondí promé ku nan a sosodé” (48:24-25).

Septuiginta (tradukshon di Tèstament Bieu na idioma griego) a wòrdu tradusí den era di Hesus ben Sirak. E traduktornan tampoko ta duna indikashon ku un otro persona a skirbi parti di e buki di Isaias.

E historiadó famoso, Josefus, durante e promé sigo despues di Hesu-Kristo tambe a deklará ku Siro tabata sa bon di e profesia di su persona dor di lesa “e buki ku Isaias a laga ku su profesianan”. Kòrda ku profesia di Siro ta aparesé den Isaias 44-45.

Ademas e teksto mas antiguo di Isaias ku ta eksistí (ròl di Laman Morto) tambe ta duna evidensia ku no tin dos outor. Segun teólogonan ku doktrina liberal, Isaias #1 a kaba skirbi na 39:8 i Isaias #2 a kuminsá skirbi ku e siguiente vèrsíkulo, na 40:1. Ma interesante ta ku ròl di Laman Morto ta inkluí 38:8-40:2 den ún solo kolúmna. Si tabatin dos outor pa Isaias, ta sumamente straño ku nan no a laga un espacio entre 39:8 i 40:1.

Ta notabel ku kada buki profétiko den Tèstament Bieu ta duna nòmber di e outor humano. Si un persona onónimo a skirbi buki dos di Isaias, esei lo ta e úniko sekshon den e bukinan profétiko ku e outor no ta identifiká su mes.

Manera nos a mira ya kaba, Isaias a usa e ekspreshon “Esun Santu di Israel” 25 biaha den e buki. Otro outor di bukinan di Beibel a usa e ekspreshon solamente seis biaha. Un evidensia ku Isaias a skirbi tur dos parti di e buki ta ku “Esun Santu di Israel” ta usá diesdos biaha den e

promé parti i diestres biaha den e di dos divishon. I por sita otro ehèmpel di uso di palabra ku ta indiká ku tin ún outor so pa henter e buki.

Segun nan pensamentu eronio, supuestamente e outor di buki dos di Isaias lo a biba na Babilonia. Ma notabel ta ku outor di 40-66 konosé e tera hudiu muchu mas mihó ku Babilonia. Di bèrdat, e no solamente ta bisa masha poko di Babilonia, ma e no ta duna impreshon ku e konosé Babilonia mes. E outor ta menshoná serunan i palunan di tera di Israel i Juda, ma no di Babilonia. Por ehèmpel, e outor a menshoná palunan di eik, seda, roble, sikamoro, sivrès, oleifi, figo, akasia, mirto, pino, bohes, èts. ma e nunca a referí na e palu prinsipal di Babilonia, e palma.

Tambe e outor di 40-66 a papia di diferente siudat di Juda komo sifuera nan ta eksistí ainda i ku murayanan di Jerusalèm ta para ketu bai (62:6), loke lo no tabata e kaso si e buki a wòrdu skirbi 150 aña despues, na fin di e era di kaptividat pa pueblo di Juda.

VII. STRUKTURA I KONTENIDO DI E BUKI

Lesando e buki, ta opvio ku por dividí e buki den tres sekshon:

I. PROFESIANAN DI ISAIAS SU ERA...HUISIO – 1-35

II. SEKSHON HISTÓRIKO – 36-39

III. PROFESIANAN PA DESPUES DI ISAIAS SU ERA...KONSUELO – 40-66

Un otro skema di e buki ku ta masha komún ta dos divishon. Warren Wiersbe su skema ta un bon ehèmpel di esaki:

I. KONDENASHON – 1-39

A. Sermonnan kontra Juda i Jerusalèm – 1-12

B. Profesianan di huisio kontra otro nashonnan – 13-23

C. Kantika di futuro gloria pa e nashon – 24-27

D. “Ainan” kontra e pikánan di e pueblo – 28-35

E. Pousa históriko tokante Ezekias – 36-39

1. Su viktoria riba Asiria – 36-37

2. Su piká pa ku Babilonia – 38-39

II. KONSOLASHON – 40-66

A. E Grandesa di Dios – 40-48

B. E Grasia di Dios – 49-57

C. E Gloria di Dios – 58-66

E buki aki no ta un komentario riba e teksto mes. Por haña hopi bon buki na otro idioma ku si ta komentá riba kada teksto. Nos meta ta solamente pa hala atenshon riba algun punto mas general òf importante pa komprendé e buki.

John Phillips a deskribí kapítulonon 1-35 di e siguiente manera: “Un momentu e buki ta pretu ku e dònder i skuridat di tempestat. E siguiente (momentu), un regenbog ta aparesé, i e (outor) ta hiba su lektornan na e Era di Oro futuro pa mundu”

Ta parse ku kapítulonon 2-6 ta dirigí espesialmente na e pueblo di e nashon di Juda i e siudat di Jerusalèm. En kontraste den kapítulonon 7-12 Isaias a fiha su atenshon riba e pais di Israel (maske mayoria di kapítulo 10 ta tokante Asiria). Ambos sekshon ta referí na un siertu “dia”—“e dia di SEÑOR” ku ta bin. E “dia” ta keda bin dilanti den e buki.

Kapítulo 7 ta un relato di dos rei (Israel i Siria) ku a ataká Juda. Nan atáke tabata un menasa serio pa e dinastia di David sobreviví. Pa solushoná su problema, rei Akaz a pidi Asiria pa yudansa, na lugá di konfia Dios.

Kapítulonon 13-23 ta kontené dies profesia kontra diferente dies diferente nashon:

1. Profesia kontra Babilonia – 13:1-14:27

2. Profesia kontra Filistea – 14:28-32

3. Profesia kontra Moab – 15:1-16:14

4. Profesia kontra Damasko – 17:1-18:7

5. Profesia kontra Egipto – 19:1-20:6
6. Profesia kontra desierto na laman – 21:1-10
7. Profesia kontra Edòm – 21:11-12
8. Profesia kontra Arabia – 21:13-17
9. Profesia kontra vaye di vishon – 22:1-25
10. Profesia kontra Tiro – 23:1-18

I talbes por bisa ku Isaias ta papia di relashon di “e dia” pa ku henter mundu den kapítulonon 24-27.

Den kapítulonon 28-33 tin seis “ai” (28:1; 29:1,15; 30:1; 31:1; 33:1), deklarashonnan di huisio kontra prinsipalmente habitantenan di Jerusalèm. E siguiente dos kapítulo ta regardá Dios Su huisio mundial i restorashon di Jerusalèm.

Nos por hasi pregunta pakiko kapítulonon 36-39 (deskribiendo algun evento históriko) ta inkluí den e buki? Nota algun pusíbel kontesta: 1) E eventonan aki lo mester ta importante di Dios Su perspektiva, pasobra tin tres relato di e eventonan aki den Beibel: 2 Reinan 18-19; 2 Krónikanan 29-30 i Isaias 36-39. (Hopi studiante di Beibel ta kere ku Isaias a skirbi tantu e relato di 2 Reinan komo esun den buki di Isaias.) Sin duda Dios ke pa nos siña algu for di e eventonan históriko aki. 2) E eventonan aki ta enserá tres milager asombroso: e angel di morto a mata 185.000 asirio (37:36-38), solo ta bai patras dies tret riba trapi (38:7-8) i Dios a kura Ezekias i ekstendé su bida 15 aña (38:1-5). 3) E kapítulonon aki ta indiká e kambio di poder for di Asiria pa Babilonia. Impero di Asiria tabata e menasa na komienso di e kuater kapítulo aki. Na final, por mira bon kla ku Babilonia lo ta e menasa bèrdadero pa e pueblo di Dios bibando na Juda. 4) E skeshon aki ta mustra e importansia di konfia Señor. Ezekias a risibí dos karta importante den e kapítulonon aki: karta di Asiria ku Ezekias a hiba na Señor den orashon i Dios a libra Su pueblo (37:14). E di dos karta a bin for di Babilonia i Ezekias *no* a hib’*é* na Señor den orashon i esaki a resultá den problema serio pa pais di Juda (39:1-8). 5) Kasi sigur tabata Isaias su intenshon pa e kapítulonon aki fungi komo un transishon for di e promé parti di e buki pa e di dos parti.

Kapítulonon 40-66 ta kompletamente diferente for di e promé mitar di e buki. Isaias su stail di skirbi ta bira mas poétiko. E tono ta mas enkurashante na lugá di kondenatorio. En kontraste di kapítulonon 1-35 ku a enfatisá huisio i e gobièrno rekto di Dios, kapítulonon 40-66 ta mustra riba e grasia di Dios, e sufrimentu i e gloria ku ta sigui. For di e promé versíkulo den e sekshon aki (40:1) ya kaba tin indikashon den ki direkshon e profeta ta bai ku su skirbimentu.

Ta notabel ku den kapítulonon 40-66, Isaias a enfatisá ku Dios ta Redentor di Su pueblo. Por haña e palabra Redentor 13 biaha den e buki, i sin eksepsion nan tur ta den kapítulonon 40-66 (41:14; 43:14; 44:6,24; 47:4; 48:17; 49:7,26; 54:5,8; 59:20; 60:16; 63:16). Tambe e palabra redimí ta aparese 15 biaha den e buki i solamente kuater biaha e no ta den kapítulonon 40-66.

Isaias 40-66 klaramente ta konsistí di 27 kapítulo. Nos por dividí e 27 kapítulo den tres sekshon di nuebe kapítulo. E promé nuebe kapítulo ta enfatisá ku Señor ta supremo. E di dos sekshon ta revelá e sirbidó di Señor (ta interesante pa hasi un estudio di e “sirbidó di Señor” den e buki di Isaias). I e ultimo nuebe kapítulo ta presentá e reto di Señor. Segun un outor, e promé nuebe kapítulo ta entatisá teologia (doktrina di Dios), e di dos sekshon su foko ta riba soteriologia (doktrina di salbashon), mientras e ultimo nuebe kapítulo ta duna atenshon na eskatologia (doktrina di eventonan futuro). Tambe ta interesante pa nota ku e promé dos sekshon ta klousurá ku palabranan kasi idéntiko: “‘No tin pas pa e malbadonan,’ SEÑOR ta bisa” (48:22; 57:21).

Por bisa ku Isaias 40-66 ta forma un solo poesia mesiániko. I ta interesante ku nèt meimei di e ultimo 27 kapítulo tin kapítulo 53. Esaki ta e teksto tokante e Mesias ku a sufri pa kousa di nos pikánan, e Lamchi di Dios. Klaramente Hesus ta sentral den e poesia mesiániko. Ta asina E mester ta tambe! Hesu-Kristo, e Lamchi di Dios, ta sentral pa nos fe, speransa, mensahe, orashon ,èts.

Maske hopi por ser bisá di Isaias 53, nos lo limitá nos komentarionan. Hopi studiante di Beibel ta di opinion ku e kapítulo di bèrdat mester kuminsá na 52:13. Ta sumamente remarkabel

ku Isaias a duna e profesia aki mas ku 700 aña promé ku Hesus a nase. Ta pusíbel pa apliká e kapitulo na solamente un persona den tur historia human: nos Señor Hesu-Kristo.

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 333-359.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 3, p. 213-256.
- Benware, Paul N., *Survey of the Old Testament* (Chicago; Moody Press, 1988), p. 194-197.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 100-103.
- Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 70.
- Freeman, Hobart E., *An Introduction to the Old Testament Prophets* (Chicago: Moody Press, 1972), p. 191-214.
- Harris, R.L., Merrill Tenney, ed. *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 3, p. 313-331.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 319-326.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 319-335.
- McGee, J. Vernon, *Thru the Bible* notes, p. 202-208.
- Mears, Henrietta C., *What the Bible is All About* (Minneapolis: World Wide Publications, 1966), p. 210-220.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 106-117, 150-155.
- Wood, Leon J., *The Prophets of Israel* (Grand Rapids: Baker Book House, 1979), p. 297-309.